

Premionan di estímulo Copa Hubenil Gobernador Felipe B. Tromp

ANUALMENTE ta otorga e premio Copa Hubenil Gobernador Felipe B. Tromp na un hoben of organisacion hubenil cu a destaca durante e añu anterior. E logronan por ta riba tereno social, cultural y deportivo. E logronan por ta premionan gana, pero tambe esfuersonan pa traha riba propio formacion y tambe haci trabou boluntario den comunidad bou guia di lidernan adulto.

Fuera di e premio grandi, e comision ta otorga tambe un premio di estímulo. Manera e palabra ta bisa, pa stimula e hoben of organisacion pa sigui cu e bunita trabou.

Den categoria di Premio Pre Hubenil, esta di ocho pa diesdos añu e premio di estímulo ta bay pa Melaiska Woodley di dies añu.



Melaiska a nace na Hulanda di descendencia Haitiano y ta biba na San Nicolas cu un amor grandi pa e cultura di Aruba.

Su talentonan ta modela, baile, basketball y atletismo y ta un mucha inspirador den su bario. El a haya e bunita reconocimiento cu un mural na San Nicolas, esta un pintura di su persona riba un muraya realisa pa e artista Sabotaje Al Montaje den cuadro di e Proyecto Aruba Art Fair. E ta conoci den su bario pa ta un fuente di inspiracion pa otronan.

Den categoria Hubenil tin cuatro hoben cu ta ricibi e premio di estímulo. Nan ta Phelan Tromp y Rashid Ruiz di Grupo Scout San Domingo, Christianne Semerel di Grupo Scout Santanero y Jaylan Ridderstaat di Grupo Scout St. Paulus Michael.

Phelan y Rashid ta miembro activo di Grupo Scout San Domingo Noord desde 2012, esta for di edad di cinco añu. Nan a drenta como bevers y a pasa den tur unidad cu e programa di scout ta ofrece na e mucha- y e hobennan segun e filosofia di Lord Baden Powell. Awo nan tin diesdos añu miembro di Grupo Scout San Domingo Noord.

Como un bon scout no solamente nan a participa na e encuentronan di scout of actividadnan oficial, pero tambe a bay pa retonan grandi. Tur esakinan



ta yuda nan den nan formacion pa bira hoben y adultonan responsabel y cu disciplina. Tambe nan mester por duna prome auxilio (EHBO). Nan a participa hunto cu otro miembronan di scout na diferente actividad social, cultural y deportivo na Aruba. Por menciona Fiesta Rotaria, Aruba Doet, procesion na misa, yuda parti awa ora di caminata, etc.

Despues cu nan a obtene nan insigne di “eerste klas verkenner” na 2023, nan a dicidi pa bay pa e reto pa logra e insigne maximo cu “kroonverkenner”. Pero debi na nan edad, nan mester a pasa pa e siguiente unidad cu ta “kroonexplorer”. E insigne aki ta esun di mas halto cu directiva di Scouting Aruba ta otorga.

Pa logra esaki Phelan y Rashid mester a cumpli cu cierto exigencianan durante un proceso bou guia di Hopman Rudolf Angela. Esaki a encera campamento den mondi memey di bestianan manera boa durante 48 ora, hike 32km campando 2 anochi, core 64km riba bicicleta campando 2 anochi, y describi nos flora y fauna, sobrevivi den mondi cu cuminda senciyo, organisa un expedicion di campamento, haci trabou boluntario di mas di 45 ora y hopi reto mas.

Tabata un trayecto extenso, pero e hobennan a persevera y dia 27 di april proximo nan lo ricibi nan insigne di “kroonexplorer”. Lo ta pa prome biaha cu Scouting Aruba den binticinco añu di existencia ta bay entrega e distincion di honor aki na dos hoben

Otro dos hoben cu lo ricibi un premio di estímulo ta Christianne Semerel di Grupo Scout Santanero y Jaylan Ridderstaat di Grupo Scout St. Paulus Michael.

Nan tur dos ta co-presidente di nan unidad

explorer. Esaki ta encera yuda organisa campamento y e trabou ta encera preparacion, cumpra material, ehecucion na e sitio y vigila e beneficio y desaroyo di cada miembro presente. Traha hunto pa logra mas hopi ta e meta. Cada dos luna ta organisa un campamento cu ta cuminsa diabierna atardi 6or y ta sigui te diadomingo 12or di merdia.

E dos hobennan menciona ta forma parti tambe di e drumband di nan unidad scouting. Y nan ta considera un honor pa toca na varios ocasion special den nos comunidad. Nan ta involvi pa yuda organisa biahenan pa exterior di scouting. Aki Christianne a haya e oportunidad di pa topa cu promedio 45 mil scouts di tur parti di mundo cu a bini hunto pa celebra hermandad scout representando Aruba. Nan a logra tecnicanan scout door di participa na 7 campamento pa un total di 24 dia unda nan a haci cu nan Unidad y Ekipo a resulta esun cu a campa mas biaha den 1 añu. Christianne a logra 6 insigne y Jaylan a logra adkiri 4 di e Insignenan.

Nan ta dedica como ocho pa dies ora pa siman na scouting fuera di ta hobennan cu ta bay scol tur dia. Sin duda hobennan disciplina cu por ta inspiracion pa otronan pa dedica nan tempo liber na nan desaroyo personal pa bira lidernan ehemplar di nos pais den futuro. E hobennan aki a realisa esaki riba propio iniciativa den nan grupo.

Na es momento Christianne y Jaylan ta actualmente na Orlando Florida bou di guia di Explorer Leider Christopher Lake, unda cu Jaylan lo realisa su di 5 insigne. Un ehempel di reconoce pa stimula mas hoben pa tuma accion pa siña mas door di ehecuta nan metanan pa haci un diferencia positivo pa otro. Christianne y Jaylan lo ricibi nan premio di estímulo despues cu nan regresa di nan biahe. Phelan y Rashid lo ricibi nan premio di estímulo riba Dia di Rey for di Gobernador di Aruba.

